

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muir. A. Azim (atba)

03 Juillet 2020

11 Dhul-Qaddah 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Bane Attributs d'Allah (Pt.11)

Par la grâce d'Allah et *Tawfiq* ki Li fine accorde moi, mo pé capave ene fois de plus contigne donne zot bane explications lors bane attributs d'Allah (twa).

Hazrat Abu Huraira (ra) fine rapporté ki le Messenger d'Allah (saws) fine dire: « *Ene 99 noms d'Allah; Celui ki mémorise zot pou rentre dans paradis. En vérité, Allah Li impair [Li Ene (1), et Li ene nombre impair] et Li content bane nombres impairs.* » (Muslim).

Dans compilation de bane Hadiths, Sahih Al-Bukhari, fine rapporter concernant bane jolis noms d'Allah ki zot au nombre de 99, c'est-à-dire 100 moins 1, et quiconque croire dans zot signification et agir en conséquence, pou rentre dans paradis; et Allah Li *Witr* (Li Ene (1) et sa c'est ene nombre impair) et Li content « *le witr* » (c'est-à-dire, bane nombres impairs).

Allah Li le Créateur (*Al-Khaliq*), ene Créateur Qui formidable. Sa attribut là indique l'organisation complexe et étonnamment zoli de bane parties constitutives de

l'univers avec zot dépendance totale à ene l'ordre fondamental et très précis ki nous trouve à la fois dans l'univers cosmique et dans sak atome ou élément microscopique [ki extrêmement tipti et ki pas capave trouver à l'œil nu].

La part de l'homme dans sa système là li trouve dans l'acquisition dans so l'âme non seulement de la connaissance de l'ensemble de bane parties de l'univers physique, même dans so bane pli tipti détails, mais aussi de la connaissance générique et détaillée de bane l'arrangements de l'univers spirituel - bane kitchoses couma par exemple, le rôle et le rang de bane différents anges, ainsi ki l'avènement de bane messagers et prophètes d'Allah et de zot rangs dans l'ordre divine.

Certains dimounes alle rode bane preuves scientifiques kot zot servi uniquement bane méthodes de mesure ki déza exister, valider et autoriser, et ki disponibles pour bane sciences physiques. Bane dimounes ordinaires zot, zot pas bizin l'aide de la science pour reconnaite l'ordre et la beauté kan zot trouve li. Et zot conner au plus profond de zot même ki ene kitchose li la vérité à cause de la foi ki zot ena, et alors zot pas bizin bane calculations et analyses scientifique pou vine dire zot ki tel tel zaffaire li vraiment vine de Bondié ou pas. Zot, zot conner ki c'est ene sel Dieu même Qui fine bizin mette tous sa système là dans ene l'ordre parfait et fine rendre sa joli.

Donc, kan bane scientifiques alle fabrique bane z'outils de plus en plus sophistiquer et kan zot alle au profondeur pou alle recherche la vérité lors bane systèmes et l'ordre établi, alors zot recherches nek alle révèle bane couches plus récents et plus profonds d'ene ordre ki déjà exister et ki déza clairs dans l'univers physique, et alors zot retrouve zot en harmonie avec l'homme de la rue [en d'autres mots, l'homme ordinaire], kot sa dimoune ordinaire capave peut-être pas ena ene théologie ou ene science [couma sa bane scientifiques là] kot zot capave appuye zot lors là, mais sa bane dimounes ordinaires là, zot conne, pour ainsi dire, de façon intuitive [au fond de zot-même] l'ordre et la beauté kan zot trouve li.

En vérité, Allah règne lors So création en tant ki Maître Ultime et Puissant avec ene grand l'amour. So *Hubb* (l'amour) ou plutôt So *Wudd* (l'amour) li beaucoup plus puissant ki l'amour de n'importe ki humain parski Li Le Donateur Ultime d'ene grand étendue d'amour (*Al-Wadud*), et sa l'amour là li tellement grand ki la

miséricorde et la compassion ainsi ki So la lumière et So pardon dessane également lors la création de So choix.

En tant ki Créateur, Allah fine créé So meilleure création avec l’amour, c’est-à-dire l’homme. Li *Al-Mousawwir*, c’est-à-dire Celui Qui Fasonner, Celui Qui donne forme, Celui Qui Modelé. Li fine créé l’homme dans so meilleur forme. De ce fait, Allah en tant ki *Al-Mousawwir* Li Celui dont l’organisation de bane formes de bane kitchoses dans meilleur l’ordre possible pas pou capave être remise en question [en d’autres mots, Li ene créateur parfait et Li donne bane kitchoses zot bane formes dans bane façons parfait ki personne pas pou capave critique Li dans So capacité de Créateur et Fasonneur de bane formes].

Si ene dimoune oulé gagne l’essence de sa attribut là dans li, alors li bizin avant tout gagne sa l’esprit de la maîtrise de soi – kot li conne contrôle li-même – et li bizin discipline li-même.

La connaissance ki Allah ena de la forme de tous bane kitchoses dans zot bane moindres détails li la cause de bane formes conscients et perceptifs ki exister et ki capave être réalisé dans le cœur de l’homme.

Le cœur de l’homme li la caze, *Masjid* ou le temple d’Allah. Le cœur de l’homme li saki nous habituer appelle le siège de tout l’amour ki li capave ena pour quelqu’un. Mais le plus grand l’amour ki connu de bane croyants pieux (*Al-Abrar*) c’est l’amour (le *Wudd*) d’Allah.

Sa l’amour divine là li également connu pour être la base de la création de l’homme. Dans Surah Al-Alaq (Chapitre 96 de Quran Shareef), Allah mentionne le mot « *alaq* ». Allah dire:

اقْرَأْ بِاسْمِ رَبِّكَ الَّذِي خَلَقَ الْإِنْسَانَ مِنْ عَلَقٍ

“*Iqra bismi Rabbikallazii khalaq, Khalaqal-’insaana min ‘alaq.*”

Lire au nom de to Rab (Seigneur), Qui fine créé - créé l’homme à partir d’ene (simple) caillot de sang coagulé. (Al-Alaq 96: 2-3)

Le mot « *alaq* » en plisse ki li veut dire ene caillot de sang coagulé, li veut dire aussi kitchose ki accrocher, ene substance ou forme ki semblable à ene sansu [ene

« *sansu* » li ressembler ene losse, mais la différence c'est ki li nourri li de disang]. Et ene l'autre sens de sa mot là, ki étroitement lié à la création de l'homme c'est **L'AMOUR**. Allah fine créé l'homme par So l'amour. L'amour ki bane humains ena les z'uns pour les autres, couma bane frères ou bane camarades extraordinaires etc., zot l'attachement les z'uns aux z'autres c'est saki faire zot accrocher les z'uns aux z'autres couma bane sansu. Zot l'affection les z'uns pour les z'autres et l'amitié ki zot manifester dans ene façon ki pli authentique, faire ki zot imite la nature et le comportement de sa bane là [c'est-à-dire, zot bane frères, camarades etc.].

Alhamdulillah, Summa Alhamdulillah, nous Amir de zone sud, Mukarram Jamaluddin Sahib ti pose moi question lors sa Chapitre là [*Al-Alaq*], et nous Amir de zone nord de Kerala, Mukarram Dr. Thahir Sahib fine tout récemment publiye ene bien joli explication et commentaire lors signification particulier de sa mot « *alaq* » là.

D'après l'analyse du mot « *alaq* », sa mot là fine servi dans plusieurs bane cas pour indique l'amour, et non pas seulement l'existence physique réelle de l'homme à partir d'ene caillot de sang coagulé ou couma ene substance ki ressembler ene sansu.

Li fine partage ene commentaire [de Hazrat Musleh Ma'ud (ra)] de bane versets 2 à 4 de Chapitre 96 [*Al-Alaq*]: « **Sa verset là veut dire ki l'amour d'Allah li enraciné dans la nature de l'homme, et ki li ti naturel ki ti pou ena ene dimoune [ki pou vini] kot sa impulsion instinctive ti pou trouve so manifestation le plus complet. Sa dimoune là ti le Saint Prophète [saws] ki ti content so Créateur de tout so l'esprit, de tout so lé cœur et de tout so l'âme. Sa verset là veut dire ki, comme le développement physique de l'homme li progressif, so développement spirituel aussi li progressif, et sa développement graduel là fine culminé en le Saint Prophète [saws].** » [Quran Shareef avec traduction et commentaire en Anglais, p.3409-10]

Masha-Allah, Alhamdulillah, Allahu Akbar. En vérité, bane versets du Quran Shareef et bane paroles Quran zot bane sources de connaissance. Pas ena seulement ene sel commentaire de bane paroles d'Allah. Bane paroles d'Allah zot ena bane significations différents et zot capave être appliqué dans bane différents situations de la vie, en particulier à l'époque de l'avènement de So bane élus, ki

recevoir la connaissance du *Ruh'il Quddus* [Saint-Esprit], et sa bénédiction là aussi, bane croyants pieux et sincères gagne sa également kot zot vine témoins de la vérité de la manifestation divine de zot l'époque. Zot confirme la véracité de bane messages ki le Messenger d'Allah de zot l'époque recevoir de la part d'Allah.

Donc, sa amène nous à l'attribut d'Allah, *Al-Wahhab* - Le Dispensateur, Le Donateur Suprême. Allah Li Celui Qui donner gratuitement sans pense à kit compensation [sans arrière-pensée].

Al-Wahhab Li Celui Qui donner sans ki dimoune demande Li. Le nom li dérivé de « *hiba* » ki veut dire, cadeau.

Kan ene dimoune rode imbibe sa attribut là dans li, sa implique ki li bizin donner sans aucaine crainte et sans attane kit faveur ou récompense en retour, ki li dans sa le monde là ou dans l'autre lé monde.

Ene invocation approprié li aide à élimine la pauvreté et le besoin [ou manque]. Li capave également libère ou de n'importe ki attente ki ene dimoune ena lors ou. Nous demande à Allah tousel parski Li Le Plus Grand Donateur Qui exister et c'est Li Qui capave accorde nous So faveur avec l'amour. So don, c'est le don [ou cadeau] de l'amour.

Ene cadeau c'est ene don sans récompense, ni l'intérêt. Si bane cadeaux avec sa qualification là zot nombreux, celui ki donne sa bane cadeaux là, appelle li ene donateur. De ce fait, seulement Allah (twa) capave donner [c'est-à-dire, faire l'action de donner] de sa façon là, parski kan l'homme li donné li, c'est dans ene certaine mesure avec l'objectif pou gagne kit l'avantage d'ene certain façon, par exemple, li capave pou gagne ene appréciation, ou sois pou libère li d'ene blâme ou pou gagne ene distinction pou so acte de bonté.

Donc, kan l'homme donner, li donner parski d'ene certaine manière, sa convenir à so but. Seul celui ki donner, sans kit arrière pensée, non pas pou gagne paradis ni par crainte de l'enfer ou pou gagne n'importe ki bane faveurs futures, mais kot sa dimoune là faire tous sa là seulement pour le plaisir d'Allah tousel, alors celui là tousel capave appelle li généreux, et même li, li pé donne tous sa là pou gagne le plaisir d'Allah [c'est-à-dire, pou gagne l'amour d'Allah]. Mais selman sa gain ki li pé roder là [l'amour d'Allah] li pas ene gain égoïste ki dimoune habituer roder et

comprend sa [signification de gain là] coumsa ; et alors sa dimoune là tousel ki faire bane bons actions seulement pou gagne le plaisir d'Allah, pou gagne So l'amour, celui là tousel nous capave dire ki li pas ene dimoune ki pé faire ene action avec l'objectif pou gagne kit faveur en retour. Li donner pour gagne le plaisir d'Allah [c'est-à-dire pour acquérir l'amour d'Allah]. Si ene dimoune recherche l'amour et le plaisir d'Allah, sa l'intention là li accepter de li, et non pas pour bane les autres gains.

Mais Allah (twa) Li, Li ene tel Être ki donner sans attane nannié en retour. Li *Al-Wahhab* pour bane croyants et pour bane non-croyants aussi. So *Rahmaniyyat* pousse Li pou être comme sa, et aucaine l'homme avec pouvoir de l'homme ou n'importe ki les autres créatures pas pou capave égale Allah dans So générosité.

Allah Li aussi *Al-Muhaymin* - Le Protecteur, Celui Qui Vigilant, Le Gardien, Celui Qui accorde la Sécurité, Celui Qui Le Meilleur, Le Plus Noble et Le Plus Élevé.

D'après certains dimounes, *Al-Muhaymin* Li veut dire Celui Qui Le Meilleur, Le Plus Noble et Le Plus Élevé. Selon bane les z'autres, *Al-Muhaymin* Li Celui Qui responsable de la subsistance de bane dimounes.

Pour gagne la qualité de sa nom là, zot bizin protèze zot de bane désirs démesuré [c'est-à-dire, faudé pas zot ena bane désirs ki au-delà de zot moyens pou réalise sa bane désirs là]. Zot bizin essaye contrôle zot, gagne ene maîtrise de zot-mêmes, et zot bizin inspecter zot-même avant tout à l'intérieur de zot-mêmes, et zot bizin réaliser et senti ki zot pas pou capave cachiette nannié de Allah.

La récitation approprié de sa nom là li propice à la purification et à l'illumination de la vie intérieure et extérieure.

Donc, mo bane très chers frères, sœurs et zenfants, mo espérer ki zot fine comprend l'importance de bane attributs d'Allah et ki zot faire zot ene devoir pour récite tous bane attributs d'Allah tous les jours, parski zot récitations et zot compréhension apporte ene multitude de bane bénédictions pour bane croyants dans zot la vie de tous les jours. Ki zot triste ou content, ou sois zot déprimé à cause bane dettes et à cause ene manque de finance ou ki zot pas ena suffisamment de bane provisions dans zot la caze, ou ki zot pas ena travaux pour subvenir à zot bane besoins et ainsi ki besoins de zot familles, alors récitation de

bane attributs d'Allah, et méditation lors sa bane attributs là, sans oublier bien sûr ki zot bizin aussi reste ferme et pratique zot *Salat* (Namaz) obligatoires et récite Quran tous les jours, alors sa pou apporte aussi ene telle lumière de l'espoir et de tranquillité dans zot la vie comme si aucaine problème zamais ti existé. Sa pas veut dire ki pas ena problèmes ; en fait zot tous ena problèmes, et pou ena bane épreuves aussi [et plisse pour bane croyants], mais seulement Allah pour faire sa paraite couma ene nannié ditout.

Jeudi le 02 Juillet 2020 après ki mo ti pé travaille un peu lors Al-Azim Tafsir'ul Quran, mo ti pé lire bane attributs d'Allah et vers 10.20pm, sa bane attributs là fine vine lors mo la lèvres : **Yaa Ahadou, Yaa Samadou, Yaa Witrou, Yaa Fardou.**

C'est-à-dire, Allah fine faire moi comprend :

Yaa Ahadou - Ô Toi Qui unique

Yaa Samadou – Ô Toi Qui Incomparable

Yaa Witrou – Ô Toi Qui Impair

Yaa Fardou – Ô Toi Qui Distincte [Qui à part, sans égale, sans pareille]

Sa bane attributs là lire pour bane dimounes ki malades ou pour ou-même si ou malade. Séki Allah fine faire bien comprend aussi c'est à propos de *Salat-ul-Shifa*, ki ene Namaz Nafil pour guérison, et aussi bizin lire sa bane *Duahs Shifa* là :

Allahumma Yaa Shaafiyal Amraade. – Ô Allah! Celui Qui donne guérison pour tous bane maladies.

Bismillaho wal Kaafi. – Au nom d'Allah, Celui Qui Suffit.

Bismillaho wash-Shaafi. – Au nom d'Allah, Celui Qui Guéri.

Bismillahi Ishféni. – Au nom d'Allah, Ô Allah, Guéri-moi !

Mo bizin remercier Allah (swt) beaucoup ki Li fine enseigne moi sa. Donc, à propos *Salat-ul-Shifa*, c'est ene Namaz ki faire pour protèze nous de la maladie. Alors lire, 1 fois Surah Yasin et ensuite faire 2-*Rakaat* Namaz Nafil avec Niyyat *Salat-ul-Shifa*. Zot capave lire n'importe ki Surahs et avant Namaz terminer, lire le maximum possible sa bane attributs là : **Yaa Ahadou, Yaa Samadou, Yaa Witrou, Yaa Fardou.**

Si zot pé faire sa *Ibaadat* là pour soigne zot-mêmes, zot capave lire sa bane attributs et *Duahs Shifa* là à haute voix et ensuite souffler lors zot les corps. Si zot

pé faire sa pour quelqu'un d'autre, lire *Duah Shifa* et sa bane attributs d'Allah là pour li et souffler lors li (dans ene nombre non-pair).

Donc, mo exhorte mo bane disciples et tous mo bane frères, sœurs et zenfants de la foi islamique pou récite humblement, lentement et avec concentration, bane attributs d'Allah et pou réfléchi lors zot signification. Mo faire *duah* ki Allah débarrasse zot de tous zot bane difficultés et accorde zot So l'amour et So miséricorde en abondance de telle sorte ki tous saki Li donne zot suffit pour zot, ki li dans le monde physique et spirituelle, ki li dans sa le monde ici-bas là et dans *Aakhérat. Insha-Allah. Ameen.*